

Far festa cun Corin Curschellas

La giubilara envida a la festa da 60 onns en il Teater da Cuira

■ (anr/ac) Damau festivescha Corin Curschellas ses 60avel anniversari en il Teater da Cuira. Da cumpagnia cun betg main che 52 artistas ed artists da chasa en diversas spartas artisticas. Els sa preschentan sin la tribuna dal Teater damaun, l'emprim d'october e contribueschan ad ina festa da natalezi publica. Bleras artistas e blers artists che sa preschentan damaun sin la tribuna dal Teater da Cuira han accompagnà Corin Curschellas ils decennis passads. Da cuminanza cun amias ed amis festivescha Curschellas ses anniversari da 60 onns. La chantautura ed actura ch'è creschida si a Cuira e che viva actualmain a Rueun è stada da chasa en blers lieus ed è sa preschenta sin bleras tribunas. Uschè vasta sco



Corin Curschellas envida a festa d'anniversari cun dablers amis ed amias.

l'engaschi artistic e cultural da l'artista è la varietad da las preschentanziuns damaun sin la tribuna dal Teater da la citad da Cuira. Na sulet cun amias ed amis che han accompagnà la giubilara durant diversas fasas vul Curschellas festivar ses anniversari. Ella vul sapienitivamain festivar da cuminanza cun in vast publicum. In publicum che dastga giudair interessantas preschentanziuns. Da la partida a la festa da l'emprim d'october en il Teater da Cuira èn Michael von der Heide, Tim Krohn, Walter Lietha, Christine Lauterburg, La Lupa, Claudia Carigiet, Flurin Caviezel, Astrid Alexandre e blers auters.

Entradas per la festa da Corin Curschellas da damaun pon ins acquistà online via Theater Chur.

LAAX

Gie alla rundella Marcau

(anr/abc) La radunonza communal da Laax ha giu da s'occupar mesjamna sera cun diversas basas legalas, numnadamain dus reglaments, duas leschas ed ina cunvegna da prestaziun. El center ei la damonda da credit pertuccont la rundella Marcau stada. La suprastanza ha presentau il project che duei augmentar la segirtad tier la cruschada da duas impurtontas vias communalas cul stradun dall'Alpsu. Senza cuntervusch, quei cun 82 vuschs gie, ha la radunonza communal da suatientscha alla damonda per in credit dad 1,32 milliuns francs. Cun quei sa la vischnaunca da Laax far la rundella denter Uletsch e Laax Vitg e reconstruir ils sutpassadis d'omisduas varts dil stradun cantunale.

Unanim han ils da Laax medemamein approbau la revisiun dil reglament per conceder dretgs da baghegiar ella zona da baghegiar per indigens a Cons. La revisiun ei stada necessaria pervia d'ina midada tier la calculaziun dil tscheins pil dretg da baghegiar. El reglament ein indicadas las valurs dil sulom cun 320 francs il meter quadrat per ina casa d'ina famiglia e 400 francs per ina casa da pliras familias.

Plinavon ha il suveran da Laax acceptau il reglament pil manteniment dallas ovras dalla meglieraziun e dalla via d'alp e d'uaul Nagens. La cumissiun da meglieraziun aveva decidu quei reglament gia la primavera vargada. Culla decisiun dalla radunonza communal entra quel uss en vigur.

Medemamein cun 82 encunter 0 vuschs ha la radunonza approbau ina revisiun parziala dalla lescha per promover habitaziuns primaras e dievers commercialas sco era per imponer taxas directivas sin habitaziuns secundaras. Era la lescha davart l'organisaziun per situaziuns d'urgenza han ils presents approbau senza cuntervusch. Quella lescha ei accordada alla surordinada dil cantun e definescha il proceder sin plaun communal. La finala han ils presents approbau ina cunvegna da prestaziun cull'uniun canorta d'affons Mäuseburg Surselva. Divers credits pli pigns e garanzias da deficit pils emprems treis onns ein cumbinai cun quella cunvegna nova.

Sustegn per la canzun romontscha

La Romontschia ed il cant retscheivan ina nova uniun

■ (anr/ac) Giusep Guanin Decurtins, Clau Scherrer e Flavia Walder envidan alla fundaziun dall'uniun «La chanzun rumantscha» margis proxim a Trun. Procurar per novas cumposiziuns ei ina dallas finamiras principalas dalla nova uniun pronta da s'installar per dar support al cant, alla chanzun e cheutras als interprets romontschs naven dil chor entochen tiel cantautur. Priu il plaider per ils iniziants dalla nova uniun «La chanzun rumantscha» preparada per la fundaziun ha Erwin Ardüser. El ha puntuau che la nova uniun vesi sia incumbensa buc en concorrenza cun instituziuns existentas che promovien il cant ed il chors romontschs. Ils iniziants Giusep Guanin Decurtins, Clau Scherrer e Flavia Walder vesien lur instituziun previda da s'installar proximamein sco amplificaziun dallas organisaziuns existentas. Primarmein per rinforzar la chanzun romontscha sco part impurtonta dalla ierta culturala. Trier fil en guila per novas cumposiziuns canticas enten incumbensar ni motivar cumponistas e cumponistas da semetter els stadals ed intonar novs ni

era texts gia existents. Porscher sustegn cun quellas stentas vulan ils promoturs dalla nova uniun a tut ils interprets dalla chanzun romontscha neu dils chors da tut gener, operas e cantauturas e cantauturs. Sulet la sparta da rock e pop vesa la nova uniun per buca necessaria dad integrar ella promoziun dalla chanzun romontscha. Tenor las explicaziuns dad Ardüser posseda quella sparta musicala ina empau altra dinamica.

Organisar in festival dalla chanzun romontscha

Buca sulet esser activs davos las culissas vulan ils iniziants da «La chanzun rumantscha». Mintga tons onns preveda l'uniun en fundaziun dad organisar in festival dalla chanzun romontscha. Sco quei che Ardüser ha explicau han ins gia en egl il termin ed il liug per igl'emprent festival che duei dar la pussevlichkeit agl'entir spectrum che tgira la chanzun romontscha da seppresentar alla publicitad. Igl'onn 2019 ei igl'emprent event previus a Trun e sco quei che Ardüser ha explicau ei ina successiun giavischada en autras re-



L'uniun en fundaziun «La chanzun rumantscha» vul s'engaschar per igl'avvegnir dil cant romontsch.

FOTO A. CADONAU

giuns romontschas. Ardüser ha plidau da resuns positivs da pliras varts sin l'idea da realisar «La chanzun rumantscha». El ei bein pertscharts che la Romontschia ei bein structurada pertuccont uniuns da divers gener, ha denton puntuau la neces-

sitad da s'organisar scochemai ch'ei seigi indicau da rimnar daners e da seppresentar anoviar. Che la nova uniun passi en vials gia existents ha Ardüser buca vultiu schar valer. Organisaziuns che han magari fadigia da realisar semeglientas finamiras ed events culturalas. Ardüser ha explicau che las organisaziuns existentas hagian per gronda part autras incumbensas e promovien la chanzun romontscha e novas cumposiziuns plitost agl'ur. La nova uniun vegli enfirmir las stentas existentas e dar ad ellas nova valur. Ils iniziants quantan cun in ferm sustegn da tuttas varts e dall'entira Romontschia viers la uniun nova e sias finamiras. Sulet persuls vegnan els strusch a puder muentar il carr a liunga vesta. Per quei speran els sin ina ferma preschientscha margis proxim, ils 4 d'october ell'ustria Tschut a Trun per dar suatientscha alla iniziativa a favur dalla chanzun romontscha. La radunonza dil margis proxim vegn a sestituir e metter en pei ils statuts ed eleger ina suprastanza. Ils iniziants vegnan a porscher informaziuns detagliadas davart lur ideas e finamiras.

reclama



100.– Rabatt pro Fenster*

- Kontaktieren Sie mich für eine unverbindliche, kostenlose Fachberatung.
- Senden Sie mir detaillierte Unterlagen zum Renovationsfenster RF1.

Coupon einsenden an:
4B, Sales Service
an der Ron 7
6281 Hochdorf

*Kostenloses Sicherheitsupgrade auf die Widerstandsklasse RC2 N im Wert von CHF 100.– pro Fenster. Das Angebot ist nicht kumulierbar und gilt nur für Privatkunden mit Direktbezug bei 4B und nur bis 31. Dezember 2016.

Name:

Vorname:

Strasse, Nr.:

PLZ, Ort:

Telefon:

E-Mail:

Das sicherste Renovationsfenster der Schweiz.

Mehr Informationen und persönliche Beratung finden Sie unter: www.4-b.ch/sicherheit oder 0800 844 444